

Cussegl dals chantuns refusa da reglar la fiera da latg

■ (sda/anr) Avant prest diesch onns han ins abolì ils contingents da latg. Tenor avis unanim dal cussegl dals chantuns na duain ins – malgrà surproducciu e pretschs bass – betg introducir novas regulaziuns per il latg. La chombra pitschna è sa fatschentada ier cun trais intervenziuns davart la fiera da latg. Sin recumondaziun da sia cumisium ha la chombra refusà tuttas trais intervenziuns senza opposiziun.

Crititgà l'organisaziun da latg

L'iniziativa dal chantun da Genevra ha pretendi ina regla lianta co controllà il pretsch e la quantidad da latg. L'iniziativa da Friburg ha giavischà disposiziuns per in contract liant per la cumpra e vendita da latg frestg. Il contract avess duì fixar la quantidad ed il pretsch per in tschert spazi da temp.

La moziun da *Jacques Nicolet* (ppsl VD) ch'è vegnida acceptada il mars dal cussegl naziunal ha vulì obligar l'organisaziun da branscha da reglar las quantitads da latg.

Il cussegl federal duai relaschar la quantidad ed il pretsch per in onn. L'or-



Malgrà ina surproducciu e pretschs bass na vul il cussegl dals chantuns betg introducir novas regulaziuns per il latg.

KEYSTONE

organisaziun da branscha n'haja fin uss betg pudì mussar ch'ella sappia e veglia reglar la fiera da latg, ha crititgà Nicolet en sia moziun. Cun il na dal cussegl dals chantuns è la moziun uss giu da maisa. Davart las duas iniziativas sto il cussegl naziunal anc decider.

Generalmain liant

Er il cussegl federal ha refusà las intervenziuns. I na dettia nagina basa legala da prescriber a l'organisaziun da branscha ch'ella stoppia reglar la quantidad da latg, ha explitgà cusseglier federal *Johann Schneider-Ammann*.

Il cussegl federal na veglia era betg midar quai. Schneider-Ammann ha fatg attent sin il contract da standard ch'il cussegl federal ha declerà sco generalmain valaivel fin il 2021. Vi da quel hajan da sa tegnair tuts cumpraders e vendiders da latg frestg. Ils cumpraders da latg stoppian mintgamai infurmar en fin ils 20 dal mais davart la quantidad ed il pretsch per il mais vegnent. Ils producents survegnian uschia las infurmaziuns necessarias per prender decisiuns, ha ditg Schneider-Ammann.